

Uunga siunnersuut: 2020-mut aningaasanut inatsisissamut siunnersuutip akuersissutiginiisaanut killigititat sivitsorneqarneri, nuna tamakkerlugu akileraarutip procentiata aalajangersarnera, nuna tamakkerlugu immikkut akileraarut aamma 2020-imut kommuninut akileraarut kiisalu kommunini meeqqanut suli atualinngitsunut ulluunerani neqeroorutinut 2020-mi akiliuteqartarneq pillugit Inatsisartut inatsisaat nr. xx, xxx 2019-imeersoq

(Aningaasaqarnermut Nunanilu Avannarlerni suleqatigiinnermut Naalakkersuisoq)

Saqqummiussissut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerneqarnera

Aallaqqaammut Naalakkersuisut sinnerlugit, inatsisissatut siunnersuutip uuma nukingertumik suliarineqarsinnaammat, Inatsisartut qutsaviginiarpakka.

Aningaasanut inatsisissatut siunnersuutip kinguartinneqarnerata kingorna, Inatsisartut Aningaasaqarnermut Akileraartarnermullu Ataatsimiititaliaq aningaasanut inatsisissap akuersissutigineqarnissaanut killigititap iluani suliarineqarnissaanut piffissakinnerulerput. Inatsisartut aningaasanut inatsisissatut siunnersuummik piffissaqarluarnerulluni suliaqarnissaa qulakkeerniarlugu, 2020-mut Aningaasanut Inatsisip akuersissutigineqarnissaanut killiliussap kinguartinneqarnissaa siunnersuutigineqarpoq.

Inatsisartut Naalakkersuisullu pillugit Inatsisartut inatsisaanni, ukiumut tulliuuttumut aningaasanut inatsisissaq kingusinnerpaamik 15. november akuersissutigineqartassasoq allassimavoq. Aammattaaq Akileraartarnermut inatsimmi allassimavoq nuna tamakkerlugu akileraarutip aamma nuna tamakkerlugu immikkut akileraarutip procentii kingusinnerpaamik 15. november annertussusilerneqartassasut. Taassuma ukiumi tulliuuttumi Aningaasanut inatsimmut ilanngullugu pisarnera nalinginnaasuuvoq.

Inatsisissatut siunnersuutikkut siunertarinearpoq aningaasanut inatsisissap akuersissutigineqarnissaanut aamma nuna tamakkerlugu akileraarutip, aammalu nuna tamakkerlugu immikkut akileraarutip procentiinik annertussusiliinissamut piffissaliussap kingusinnerpaamik ulloq 21. novemberimut sivitsorneqarnissaa. Piffissaliussaq taamaaliornikkut ullut 6-it angullugit sivitsorneqassaaq.

Aningaasanulli inatsisissap akuersissutigineqarnissaanut piffissaliussaq sivitsorneqarpat tamanna aamma nunap kommuniinut sunniuteqassaaq. Akileraartarnermut inatsimmi allassimavoq ukiumi tulliuuttumi kommuninut akileraarutit kingusinnerpaamik 1. december annertussusilerneqarsimassasut. Kommunit aammattaaq ukiumi tulliuuttumi missingersuutit kingusinnerpaamik 1. december akuersissutigereertussaavaat.

Taamaamat inatsisissatut siunnersuutip aamma siunertaraa piffissaliussat taakku sivitsorneqarnissaat, taamaalillutik kommunalbestyrelsit missingersuutiniq suliaqarnissaminnut aamma lu kommunimut akileraarummik annertussusiliinissaminnut piffissaqarneroqqullugit. Matumani siunnersuutaavoq piffissaliussap 2. decemberimut sivitsorneqarnissaa.

Kiisalu siunnersuutip aamma kingunerissavaa kommunit, meeqqat suli atualinngitsut perorsaanikkut inerikkiartuutaasunik ulluunerani neqeroorutiniinnerinut akiliutinik annertussusiliinissaannut piffissaliussamik kinguartitsinissaq. Akiliutissat taakku kingusinnerpaamik novemberip qaammataani kommunalbestyrelsinit annertussusilerneqarsimasussaagalarput. Matumani siunnersuutaavoq piffissaliussap taamatutaaq 6. decemberimut sivitsorneqarnissaa.

Inatsisissatut siunnersuut ukiup naanerani atorunnaassaaq, tassalu 2019-iinnarmi atuutissalluni.

Naalackersuisut matumuuna siunnersuut Inatsisartunut inussiarnersumik suliassanngortippaat.